

## KERATAN AKHBAR

---

TARIKH : 27 DISEMBER 2022

AKHBAR : BERITA HARIAN

PAUTAN : <https://www.bharian.com.my/amp/berita/nasional/2022/12/1044800/kpdn-kementerian-ekonomi-tubuh-sekretariat-bersama-tangani-isu-kos>

### KPDN, Kementerian Ekonomi tubuh sekretariat bersama tangani isu kos sara hidup



Penurunan harga minyak masak botol adalah antara langkah kerajaan membantu meringankan beban kos sara hidup rakyat. - Foto fail NSTP

KUALA LUMPUR: Kementerian Perdagangan Dalam Negeri dan Kos Sara Hidup (KPDN) serta Kementerian Ekonomi menubuhkan sekretariat bersama bagi membincangkan peranan pelbagai agensi dalam menangani isu kos sara hidup.

Menteri Perdagangan Dalam Negeri dan Kos Sara Hidup, Datuk Seri Salahuddin Ayub dan Menteri Ekonomi, Rafizi Ramli, menerusi kenyataan bersama, berkata sekretariat itu akan menjadi platform di peringkat pegawai bagi tujuan berkenaan.

"Perancangan pelaksanaan beberapa penyelesaian pantas sedang diperincikan KPDN dan Kementerian Ekonomi. Ia termasuk pelan tindakan kerjasama rentas kementerian dan mengemas kini beberapa prosedur pelaksanaan dasar yang dijangka dilaksanakan mulai hujung Januari depan.

"Menerusi pelbagai perbincangan ini, ada keputusan yang sedang dilaksanakan serta masih memerlukan perincian. Kerajaan komited membantu rakyat, tanpa menjejaskan kedudukan ekosistem perniagaan serta industri yang masih dalam tempoh pemulihan pasca pandemik COVID-19," katanya.

Mereka berkata, kerjasama semua pihak berkaitan rantai nilai, termasuk kerajaan, pengeluar, peniaga dan juga rakyat diperlukan bagi pengawalan inflasi dan kos sara hidup.

"Kos sara hidup bukan sahaja membabitkan harga murah, sebaliknya perlu adil kepada pengeluar, peniaga dan pengguna.

"Kerajaan berharap perkara ini akan memudahkan pengurusan kos, seterusnya memastikan segala penjimatan dapat dialirkan kepada pengguna, sekali gus meringankan beban kos sara hidup rakyat," katanya.

Mereka antara lain, menyarankan orang ramai memberi tumpuan kepada empat fokus bagi memperkukuh peranan sebagai pengguna bijak, dengan merancang perbelanjaan sebelum melakukan pembelian.

Selain itu, menyesuaikan kecenderungan jika terdapat pengganti bagi barangan yang mencatatkan peningkatan harga, membuat perbandingan harga menerusi aplikasi 'Price Catcher' dikendalikan KPDM serta membeli mengikut kuantiti diperlukan.

Mengulas lanjut, kedua-dua menteri berkenaan berkata, kerajaan sudah mengambil beberapa langkah proaktif bagi menangani isu berkenaan, termasuk tindakan jangka pendek dan sederhana.

Terdahulu, Perdana Menteri pada Mesyuarat Khas Majlis Tindakan Sara Hidup Negara (NACCOL), 27 November lalu, memberi tempoh dua minggu kepada kementerian terbabit untuk memberi cadangan untuk menangani kos sara hidup rakyat yang tinggi.

Ia disusuli cadangan yang dibentangkan dalam mesyuarat kemudiannya dan Mesyuarat Kabinet, masing-masing pada 13 dan 14 Disember lalu.

Beberapa siri mesyuarat lain membabitkan beberapa pemegang taruh, termasuk kementerian, pemain industri, ahli akademik dan wakil pengguna turut dianjurkan.

Antara keputusan yang dicapai ialah kawalan harga dan subsidi ayam standard serta telur Gred A, B dan C diteruskan sehingga suatu tempoh ditetapkan.

Tarif elektrik juga kekal bagi pengguna domestik, komersial dan industri, selain Padiberas Nasional Berhad (BERNAS) akan menyalurkan peruntukan RM60 juta kepada pesawah, masing-masing RM10 juta bagi 2022 dan RM50 juta pada 2023.

Selain itu, kerajaan juga memutuskan untuk mengimport telur bagi memastikan bekalan mencukupi dalam pasaran tempatan.

Di samping itu, perincian pelaksanaan Harga 2 Peringkat bagi minyak sawit mentah supaya harga minyak masak tulen kemasan botol di pasaran domestik, dijual pada harga lebih rendah bagi

mengurangkan tekanan terhadap permintaan dan penggunaan minyak masak bersubsidi polibeg sekilogram.